



**Jumat, 05 Nopember 2021**  
**Ogen: Esekiel 18:25-32**



**Pebaruilah Ukur Ras Pusuhndu**



**L**a sekalak pe ateKu kam mate, nina Dibata man bangsaNa. Dibata ersura-sura gelah bangaNa nggelu labo mate. Nggeluh ertina ternanamisa wari-wari si ibereken Dibata alu mehuli, alu senang ras dame. La lit perubaten entah perang, la lit kemusilen ras la lit penindasen. I kataken Dibata si enda man Israel perbahan keleng ate, sekali ikatakenNa keleng rasa lalap ikelengiNa.

Tertima-tima kal Dibata nandangi anak-anakna mulih man banNa. Tertulih-tulih IA katawari bangsana e reh ndahi IA. IpersingetiNa rusur bangsaNa nina, terkelin kap kalak jahat di kune ia jera dengen ilakokenna kai si benar dengen mehuli, ikelini kap kesahna. Enda padan Dibata, janah labo pernah la isehkenNa. Kepeken lit kesempatan terkelin man kalak jahat, adi reh mulihken ku Dibata janah itadingkenna kejahatenna. Petembil ras si e, di kune sedekah enda lit kalak bujur, patuh ndalanken persuruhan Dibata, tapi, erkiteken kejahatanen isekelewetna ia pe dungna erbahan si jahat, la icikepna enteguh kinitekenna seh masa penghakimen Dibata, la banci lang kalak si bage mate. Mate ia erkiteken kejahtenna.

Emaka nina man bangsaNa, pebaruilah ukur ras pusuhndu! Ola pediat kejahatanen engkuasai dirindu. Ola pelepas kejahatanen e mabai kam kempak kematen. Sedekah enda kam enggo nundalken aku, lanai Aku ibegikenndu, usur-usurndu erbahan kejahten si la ateKu ngena. Genduari mulihlah kempak Aku, la pernah aku lupa nandangi padanKu e me maba kam kempak keterkelinen. La ateku nadingken kam, keleng kal ateKu kam. Perkatan Dibata enda seh pe man banta si enggo iselamatkanNa i bas diri Jesus Krsitus. Sekali kita enggo ibenarkenNa, rasa lalap min kita nggeluh benar, mehuli janah erguna geluhta man kalak si deban. Berelah pusuh ras ukurta tiap wari ipebarui Dibata, gelah sura-suraNalah lalap si nggeluh i bas kita.